

四庫全書

集部

欽定四庫全書

滄溟集卷六

明 李攀龍 撰

五言律詩

酬皇甫虞部寒夜書懷見寄

兄弟播清徽詞林振羽飛
再來郎署重何謂宦情違
夜雪留沽酒寒燈坐掩扉
共嗟羈物役歲晏此依依

圓硯效徐庾體

片石分雲出良工向月刪
自疑臨壁水誰為縮壺山
洗

墨沉金鏡呵冰斷
玉環畫眉京兆婦
纖指曲池間

秋扇

自從團扇棄空復掩梁塵
寒影收雲葉清光暗月輪
誰憐班氏女薄命漢宮人
但使絨蘭筍君情會更新

同皇甫繕部寒夜城南咏月

片月掛遥岑層城曳素陰
寒分宮樹淨影落御溝深
結冷悲征笛勻霜上擣砧
西園芳宴後白雪復誰吟

元夜

公子聯鑣語佳人把袂歡星橋雲外出火樹雪中看夜色
開清禁春醕許從官仍聞祠太乙達曙禮仙壇

登省中樓望西山晴雪

忽見西山雪高樓重倚闌數峰城上出落日署中寒佳
色繁天仗清光切露盤小臣操郢曲願獻聖人看

憶弟

新醪楊柳色不醉欲何如
薊北三春雁山東二弟書
宦情閒遂淺人事病全疎
未擬酬恩去空令憶舊廬

初夏趙氏園亭

獨值春風後幽期此重過
開樽黃鳥至高枕綠陰多
簪絃殊閒事乾坤一放歌
淹留君莫厭吾道本巖阿

送孟得之

十載薊門客秋風見長年
思家明月夜驅馬白雲天
來雁授衣後黃花落帽前
何人過攜酒共醉黎陽川

登省中樓

蕭瑟賦悲哉西山爽氣開
白雲海色斷落日秋陰來
砧

高長樂苑雁下華陽臺如何此時望客思轉難裁

酬徐員外舟中新詠見示

何處逢搖落秋風又別家天清鴻雁影江滿荻蘆花
明月留仙珮寒星犯客槎到來開篋笥新句動京華

送諸光祿還於越

幾年東省月坐憶故園遊忽有緘書至蘭亭契事脩
笑芙蓉天鏡曉風雨石帆秋到夜應逢雪門多乘興舟

長陵

明裡趨歲序陟降儼昭回
容物中原在乾坤北極開
松楸千騎入風雨百靈來
共話犁庭役遺方重可哀

朝陵夜作

上陵無不美秋杪更宜看
風雨朝佳氣旌旗擁漢官
星流千嶂過月出萬松寒
倚馬清鐘外新霜滿玉鞍

白雪樓

諸郎難得意非是敢沈冥
拙宦無同病清時有獨醒
千家寒雨白雙闕曉煙青
又值高樓雁寥寥不可聽

送楊子正還濟南

我家白雲渚落日掩孤城讀書草堂上濯纓湖水清古
來失意事不獨名未成北風敝裘雪誰見棄繻情

重送楊生

十年湖上別風雪此相親把酒論時事霑衣向故人浮
名青歲換生計白雲貧但去卧芳草山中鴻雁春

殿卿至

駿馬何當出金高郭隗臺雲中春酒熟書後故人來白

首文章事青雲王伯才誰為一知己念子正悠哉

送殿卿

嗟君復失意吾道轉堪疑白雪論先達青雲合後時落花寒食過載酒故山期莫以楊朱淚春風灑路岐

章行人使潞藩

使者持符下風塵叱馭前諸侯城赤狄列嶂黨青天牟麥祈年時芙蓉避暑筵相逢多愛客共賦遠遊篇

十六夜集劉子成宅

羽書三十度飛騎動長安今夜樽前月還同燧火看入
門清影滿久坐素華寒何處關山引如悲行路難

聞砧

永夜盧家婦深閨坐自傷拭砧散明月投杵上清霜別
恨繁鴛綺哀音急鴈行同袍征戰盡刀尺斷人腸

送張比部募兵秦晉諸郡

天威嚴滅敵使者出秋官白羽徵兵入黃金結士懽風
雲千騎動雨雪二陵寒無易行問客能登漢將壇

送沈郎中守順慶

見說褰帷處，千山擁使君。
嘉陵渡春水，棧道轉秋雲。
郡下平蠻檄，家傳諭蜀文。
病餘饒卧理，能不憶離群。

春日韋氏園亭同元美賦

二首

春塢花冥冥，斜陽倒玉鉶。
風塵猶傲吏，天地此空亭。
共醉薊雲白，相看燕草青。
我來吟澤畔，不是獨為醒。

其二

藉草到流水，看花延落暉。
客中過寒食，馬上改春衣。
移

席青山出開樽白鳥飛天涯有朋好能使宦情微

夏日同元美徐子旋賈守準劉子成集張氏園

亭得談字

共載杯中物聊停塵外驂
路人終白眼世事豈清談
高枕夏雲出空亭斜照含竹間
有流水可以漱餘酣

初夏同元美汪伯陽皇甫子循集姚明府園亭

得春字

五柳陶潛宅猶藏杜曲春
綠陰衣上滿黃鳥席邊新河

朔當年事風流我輩人胡為日車馬擾擾向紅塵

送蔡少府之陽武

君歸寒食後猶及縣中花趨府具茨野鳴鞭博浪沙大河秋色外使者白雲槎豈不勞行役風塵見歲華

為殿卿悼亡

歌梁塵未斷舞袖影方閒落月窺珠鏡青春暗玉顏為雲歸峽裡竊藥去人間安得招魂術姍姍步幄還

答殿卿

故園春草後書札問同袍
海嶽遊當壯風塵卧正高
大名詩裡出浮世酒中逃
顧我仍多病時危小吏勞

送獲嘉郭明府

仙舟新出宰秋色渡淇河
官屬諸侯貴君才百里多
政齊吳季重地接衛朝歌
漢主憂南服長纓送尉佗

雪溪徐山人
二首

風塵餘髣髴天地此栖遲
不問家人產寧求國士知
門無荷蕢過鄰有灌園期
得道憑烏几藏名號鹿皮

其二

自有浮雲戀，非因倦鳥還。
林光清客夢，湖色駐人顏。
歲序高懸榻，風塵老抱關。
不投明月壁，甘隱大雷山。

毛刺史姑蔑高齋

武陵看花處，二仲得相聞。
雨白閩天合，山青越徼分。
書聲散秋瀑，翰墨染春雲。
府檄何年事，猶餘狷鶴群。

出郭

出郭隨吾適，人家杜曲邊。
溪流紫去馬，山路入鳴蟬。
禾

黍殷秋作茅茨足晝眠可能祛物役歸買汶陽田

張氏園亭

辟疆開別業載酒雨中看亭敞千花暝樓空萬竹寒呼
童攜枕簟勸客解衣冠宿我山窻下聽詩坐夜闌

碧雲寺禪房

佛土秋逾淨花臺夜復香一燈醒夢幻孤磬散清涼月
上梵輪滿湖開天鏡光新詩分妙偈病客對空王

早春元美公實訪茂秦華嚴精舍同賦

招提多病客擁褐世間情法自傳燈得詩先卓錫成年
光雲樹麗春晝雨花明若許東林住還攜漉酒生

十四夜同王徐宗梁四君子集靈濟宮

二首

愛此壺中約人皆曼倩才華燈懸日月仙樹接蓬萊青
鳥銜詩去金貂換酒回明宵祠太乙方士漢宮來

其二

逍遙玄圃望清切紫微層月出三山樹春回萬井燈無
悲田變海但願酒為滄門外金羈影王孫自五陵

張山人

吾鄉張仲蔚未是蓬蒿人
伏臘東籬下漁樵北海濱
官家還賦役客路且風塵
織妾齊紈素開筵嬌上春

春日

為客淹歸騎思家過斷鴻
春衣花發後寒食雨聲中
生事羞人問時名與衆同
自甘郎署隱不哭宦途窮

柬公實

如何梅發後更憶故園春
海上多歸夢天涯一病人
世

情元慘淡宦迹好逡巡莫作鴻冥客青雲未可親

同元美與諸比部早夏城南放舟

六首

豈悟風塵客還能汗漫遊天涯唯短髮海內此扁舟宦
跡清時劣人才畫省優百年渾綠醕一日且滄洲

其二

最憐行役久為樂未言疲自起投車轄長歌覆羽巵江
湖青雀舫僚友白雲司醒後鷺相問佯狂信有之

其三

誰為河朔飲吾願罄交驩杯動滄波色舟空白日寒題
詩溪鳥過岸憤野人看不是江湖興風塵此道難

其四

落日維舟好君其問水濱舉觴遙送鳥倚樹醉看人各
負詩無敵翻驚會有神明朝在城郭騎馬共風塵

其五

春歸興不孤勝地此相呼公等稱詞伯余將混酒徒山
光含浩蕩秋意颯江湖樂事關窮達浮生敢自誣

其六

言尋韋杜曲與客放船行樹影含衣動溪光逼酒清狂
來出真態醉裡見浮生所以山公後寥寥達者名

寄茂秦

向來燕市飲此意獨飛揚把袂看人過論詩到爾長世
情揺白首吾道指滄浪去住俱貧病風塵動渺茫

再遊南溪同應駕部徐比部賦

四首

此日南溪約應徐賦客同據牀千竹下進艇百花中天

入華陽館雲生碣石宮昔賢何慘淡吾醉任鴻濛

其二

覆席花如待窺簾鳥似知到來拚共醉坐久見吾詩更
跡江湖傲仙才日月欺幸逢休澣出不顧尚書期

其三

晏遊無俗吏休沐有殊恩碧草堪同藉紅塵可重論溪
聲留倚仗山色取當樽夙昔疑吾醉維舟尚在門

其四

花鳥從春過嬉遊到夏偏白雲行酒上清吹起舟前世
路身何得吾徒賦必傳寧須千日醉不擬衆人憐

郊行二

首

稍似武陵溪人家綠樹迷桔槔茅屋上荷蓀薊門西清
吹生衣袂繁陰散馬蹄紅塵纔只尺城郭意多睽

其二

並馬未央前看雲過灞川時逢黃鳥住欲就綠陰眠宦
豈登臨拙名非案牘傳風塵朋好在回首汶陽田

東元美二

首

偃蹇寧知病，今如藥裹何。
清齋山雨至，高枕夏雲多。
詞賦芳顏妬，風塵壯志過。
相憐誰最久，把臂此蹉跎。

其二

久矣疲朝謁，深惟傲吏情。
臨風看玉樹，消渴望金莖。
返照虹霓出，浮雲駟馬行。
慚無枚叔賦，起爾薊門城。

夜過元美

二首

眼底誰同病，天涯好自親。
放歌依白日，縱飲向風塵。
世

態搖知已時名走衆人朝參君莫嬾漢主憶詞臣

其二

病卽科頭出狂仍枕腹眠禮非因我設汗不受人憐興
盡銜杯外言深把燭前開門看墮月騎馬問朝天

夏日同元美子與子相天寧寺送別公實

二首

晏坐人天近清齋僧夏深出門成遠道駐馬向祇林益
愧風塵色相看湖海心惠休能怨別為擬碧雲吟

其二

西域黃金地南訛大火天贈言迴白雪寒色動青蓮幻
跡抽簪外浮名把袂前古今皆涕淚去住各風烟

夏日同元美子與集子相宅

佳客堪常見幽期暑亦過披襟度風雨把酒出星河嬾
拙元相藉文章敢自多夜深忘白羽玉樹倚蹉跎

柬子相

二首

已負西山約將無惜壯遊懷人當落日卧病復清秋時
事君高枕風塵我敝裘加餐看物理天地一虛舟

其二

楚客秋多病，羈心私自憐。
各天散朋好，八月見烽烟。
白露寒砧下，青楓過鴈前。
豈應裁恨賦，寫任故人傳。

別汪正叔員外

幾年金虎署，與爾結交歡。
傲吏莊生似，詩家鮑叔看。
春光燕樹合，雨色薊門寒。
各杖臨岐淚，風塵去住難。

懷魏順甫

白雲同署客，相念意悠哉。
交道蕭朱失，文章屈宋來。
風

塵還傲吏案牘豈時才不見黃金駿秋高薊北臺

登黃榆馬陵諸山是太行絕頂處

四首

黃榆高不極臨眺亦奇哉河勢中原圻山形上黨來
白雲橫塞斷寒峽倚天開搖落清秋色多慙作賦才

其二

不盡寒雲外青峰落照多秋陰生大鹵木葉下淖沱
巨壑藏風雨飛梁挂薜蘿重關三輔地躍馬意如何

其三

振衣巖木下倚杖白雲層落日懸孤塞清秋度馬陵千
峰寒自出大澤莽相仍左瞰邢襄郡分符憶股肱

其四

秋色自冥冥風煙接井陘關門開落日山路出寒星太
守方乘障清時敢勒銘杉松迴朔氣哀壑未堪聽

答明卿病後見寄

二首

薊門搖落後楚客病如何秋色高金掌西風滿玉珂開
樽鴻鴈至染翰五雲過應憶山陽會疎狂阮籍多

其二

吳生何偃蹇稱病不朝天
侍從官非拙浮沉世所憐
黃金燕士裏白雪郢人前
自識銜杯趣逾看結襪賢

寄元美

首二

宿昔神仙省青雲向爾親
償金聊玩世抱玉故調人
氣色高題柱文章老斲輪
別來多所憶卧病上林春

其二

豈不為同舍于時媿重名
佳人誰獨立大將爾橫行
病

起高詩興春光美宦情懸知思遠道落日薊門城

即事

四首

浮雲如浪跡春色且邢州磬折人堪老蕭條客自愁孤
城山下出大陸日西流請郡終何意風塵復倦遊

其二

天涯看薄宦何以異漂蓬才豈分符後名非薦疏中黃
塵飄落日白羽挿春風聞道漁陽戰方論衛霍功

其三

嬾嫚終疑傲和光意遠哉元龍無客禮方朔有仙才疾
苦褰帷過風塵領郡來那須論往事作賦栢梁臺

其四

使者殊旁午吾生自不辰文章看長物道路竟何人寒
食孤城外檐帷大澤濱那堪楊柳色風雨傍行春

寄宗考功

二首

別離如昨日豈厭廣陵濤春色漁陽滿烽烟海上高文
章迴白雪顧盼解綈袍下走猶三輔蕭條欲二毛

其二

春色還堪起青雲固可披振纓人不病把袂客能詩奏
事明光殿掄才藻鏡司稽康猶自嬾早辱巨源知

寄殷卿

二首

人情原慘淡世路故蹉跎意氣彈冠少風塵按劍多客
居深雨雪春夢遠漳河賴有西山色猶堪載酒過

其二

燕山為客地莫共酒人居吾輩詩名大其徒劒術疎風

塵官不調雨雪歲將除何限東歸意春花滿舊廬

春興

二首

短髮黃塵裡浮生白日徂詩名堪自見經術敢相誣薦
列終才更逢迎豈壯圖有年輕名杜不病足江湖

其二

案牘將能事文章敢具陳跳梁看此物隱几過時人返
照生殘雨浮雲矯上春夙心唯病免不欲滯風塵

重送許永寧

二首

絕域天應斷揚波海未平浮雲隨薄宦華髮繫微名傳
檄西南定褰帷瘴癘清看君饒卧理經術晚逾成

其二

世情今可見此謫竟堪陳偃蹇難容汝文章不利人清
秋炎海外落日大荒濱莫更埋銅柱功名老漢臣

郡齋送張肖甫

二首

薊門相憶處豈不問加餐卧理非吾意詩名向爾看白
雲尊酒盡山色郡齋寒莫惜重投轄秋風道路難

其二

送君何所有城上太行山落日堪相憶浮雲未可攀俱
言張翰去得御李膺還莫自悲秋色能摧壯士顏

閣夜示茂秦

四首

相逢殊不惡久別竟誰驩貧病他鄉老交游古道難開
樽山欲出說劒雪逾寒如此蕭條色高齋爾自看

其二

為客今猶在浮名信已勞病來哀綵筆老至戀緇袍閣

卧風塵過銜杯夜色高
舊知江夏守不厭禰生豪

其三

病起看時事歸心不可裁
著書官欲罷問字客還來
月出樽堪滿霜清角自哀
相憐成白首明日阻三臺

其四

把袂今何夕高齋雨雪清
詩才君矍鑠酒興我從橫
同病無交態相依豈世情
春來徵渤海陳對引王生

寄元美

四首

我昔朝宗日君停使者軒並驅皆上駟相遇復中原草
昧時人起風塵國士恩別來春色滿無處不銷魂

其二

若問除書意君何異積薪姓名常借客蹤跡竟疑人為
郡空高第當朝各要津拂衣吾所欲不是避風塵

其三

漁陽春欲盡漢使未堪愁邊郡多豪俠風塵一壯遊浮
雲寒大漠白日澹幽州莫更觀遼海蕭條正北流

其四

何悟淹為郡風塵日以難
宦情疎自解人事拙相看
高枕西山色清齋大麓寒
期君秋月滿從此掛吾冠

夏日行部遇明卿子與於瘿陶邑

何來漳水上早晚發長安
放逐吾曹在風塵此道難
孤城高自卧萬事醉相看
莫擊鄒陽劍霜飛五月寒

郡齋與元美賦

握手今何在
高齋共此樽
衆人方睥睨
二子向乾坤
經

術從吾淺詩名得爾尊當時楊馬輩誰復在金門

送元美

二首

吾曹天地在不惜滯風塵意氣能無合文章自有真齊
名他日事側目此時人為別還秋色樽前白髮新

其二

把酒論離索褰帷送友生白雲高大麓秋色重孤城偃
蹇還詩句蕭條自世情贈君無趙璧落日片心明

黃河

復就三秦役還為四牡歌北風揚片席大雪渡黃河才
豈諸郎少名非一郡多儒官明主意吾道好蹉跎

關門雪望

西來千里雪斜日滿函關秋水何當落浮雲自不還積
陰高紫氣寒色壯秦山似欲欺雙鬢蒼茫到客顏

發長安

此處看春色蕭條客自禁風塵為郡過蹤跡抱關深不
盡傳經意難言作賦心故人多道路薄宦有登臨

涇州

迴磴層雲上孤城返照間人煙趨白阪睥睨走青山芻
粟浮涇下旌旗度隴還時看乘障吏車馬出蕭關

秋日

首四

薄遊寒暑換仍自滯孤城華髮看人事浮雲識宦情拂
衣驅病色懸榻避時名但欲眠清晝相朝任友生

其二

此物還堪惜何官不可休驅馳如昨日藥餌更清秋名

已千人廢家徒四壁愁南山歸自好沮溺本同流

其三

倦遊非一日乘興復三秦多病難為客浮名喜中人未
堪沈案牘何以走風塵祖帳東門外賢哉一老臣

其四

還鄉明日事可奈簿書勞棄置看同病風塵避二毛酒
如涇水濁枕對華山高不是清秋色何人見反騷

五日和許傳湖亭讌集

二首

城頭片雨懸客醉嵒湖邊酒奈榴花妬人堪桂樹憐五
絲還令節雙鬢抵流年莫蹋王孫草淮南賦已傳

其二

青樽臨北渚一為故人開此事成今昔浮雲自往來花
間攜枕簟鏡裡出樓臺忽就投湘賦深知賈誼才

寄元美

寥落文章事相逢白首新微吾竟長夜念爾和陽春把
酒千門雪論交四海人即今燕市裡擊筑好誰親

贈子與

握手論文者春來限各天
即今行樂處不似舊游年
神物風塵裡時名我輩前
豈令徐孺榻白日此長懸

汪員外移水部時城京師汪為植

聞有金城役掄茲水部才
中原憂被髮使者詠于懸
睥睨燕山接風雲瀚海來
懸知胡騎遁天子宴蓬萊

即事

四首

羽書秋色外飛輓海陵迴
日上犁庭議時難度漢才物

情奇士過天造異人來側席勞明主黃金正滿臺

其二

即今難授鉞誰可靜胡塵談笑存能事艱虞失衆人大
軍歸掌握王者自經綸不復憂驕悍如林護北辰

其三

使者晨馳壁奪歸平虜章自天懸斧鉞擇日設壇場萬
馬中原集諸軍上苑旁主恩無可報一戰取名王

其四

天子何神武乘秋欲破胡儒臣擢甲冑大將解兵符叱咤風雲合艱危日月扶北瞻陵寢色蔥鬱近皇都

賦得屏風

虛屏漢宮裡有女白頭吟色倚琉璃怯秋來湘水深歡情張畫燭愁坐掩清砧莫為蒼蠅誤君王在上林

渡滹沱

滹沱來不極曉色蕩孤城擊楫中流過褰帷下吏情天銜紆岸轉日上大波行獨在知津後風塵見濯纓

廣陽山道中

出峽還何地杉松鬱不開
雷聲千嶂落雨色萬峰來
地勝紆王事年饑損吏才
難將憂旱意涕泣向蒿萊

趙州道中

獨往何為者栖栖意不歡
褰帷秋雨過伏軾夏雲殘
潦水陰相積薰葭晚自寒
大夫方跋涉天步屬艱難

吳舍人喪內

首二

楚妃色殊衆不獨下堂悲
鼓瑟瀟湘夜秋雲未可持
河

流雙露掌月出萬年枝屬有將雛曲能無泣鳳池

其二

可憐御溝水見此白頭吟病客思江郡詞臣在上林春
風動花樹秋月散清砧唯有陵陽淚知君抱玉心

和殿卿白雲亭醉歌

狂殺王門客空亭日嘯歌那知珠履散自愛白雲多短
髮明秋水長裾曳芰荷獨憐枚叟在不復厭婆娑

元美以家難羈京作此為唁

四首

馳騁溜澠日功名與宦情高堂一為坐世路遂相輕行
乞還燕市悲歌復薊城佩刀風雨夜堪作箭中鳴

其二


一自抽簪後漂零見此身通章尋悟主懷刺更依人寒
入綈袍色愁生黍谷春不因家難劇君宜在風塵

其三

海內論兄弟蕭條二子才一時稱病罷萬里拂衣來雨
雪人高卧蓬蒿客自回偶然占劒氣夜夜向燕臺

其四

聞道周旋地偏承老父顏
素饘時在側賓客稍居閒
函谷更封出夷門執轡還
莫將公子淚亂漫灑燕山



滄溟集卷六

欽定四庫全書

集部

滄溟集卷八

詳校官庶吉士_臣柳邁祖

中書_臣劉源溥覆勘

覆校官中書_臣朱鈐

校對官庶吉士_臣嚴福

謄錄監生_臣劉耀馥

欽定四庫全書

滄溟集卷七

明 李攀龍 撰

五言律詩

春日閑居

十首

即令關請謁何用乞江湖僻性終難狎浮名本易汙杜
門人事過歆枕歲華徂薄俗還堪畏崎嶇比宦途

其二

白日移高枕青山答放歌病纔宜偃蹇老自厭婆娑禮

數諸生絕交遊二仲多江湖春正滿更欲混漁簑

其三

樂餌休官嬾蓬蒿謝客深濁醪殊解事高枕自知音老
大翻陵勁文章豈陸沈浮雲終日在瀟灑竟何心

其四

五穀功名薄雙龍羽翼乖風塵凋短褐雨雪閉高齋慘
淡幽人色飛揚壯士懷少年何太苦妖冶事形骸

其五

奉使談經日單車西入關掄才牛口下得士鳳毛間白
雪千人失黃河萬里還即今高卧處猶不減商山

其六

乞歸君已見削迹我何求交態疎能變時名久自休中
原來病色萬里入春愁不是忘機客還驚海上鷗

其七

結舌論文地甘心養拙年朱門人自老白雪調空傳世
路蓬蒿外浮名燕雀前中原二三子夙昔共周旋

其八

病起獨登臺春光萬里來
浮沉還我輩俯仰見人才
華髮風塵過青山雨雪開
浮雲堪倚杖落日好銜杯

其九

漂零唯濁酒落拓總狂生
彭澤差聞道高陽橫得名
罷來詩慘淡卧久興淒清
日對春湖色潺湲嬾濯纓

其十

五柳嵒湖濱先生隱是真
文章堪側目潦倒竟全身
何

必論交地長須縱酒人即令東蹈海斷不混風塵

夏日東村卧病

十二首

平生偏伏枕暇日是抽簪病著青山色愁高白雪音雲
霄懸出處蹤跡間浮沉不必名俱毀方知二仲心

其二

放歌知帝力縱飲見天真綵筆風雲老青樽日月新詩
驚噉蔗客酒讓采薇人即使妨幽事何須傍隱淪

其三

自甘成獨往誰復病相憐金盡論交地囊餘解擯篇清
齋芳樂餌華髮媚林泉不必憂生事深耕種秫田

其四

不謂幽棲處還堪抱膝吟大雲千里駐片雨二湖陰暑
逼藤蘿淺涼生枯栢深鮑山終日在知己媿黃金

其五

未同疎雨至勿翦夏雲繁片華樽前出雙流樹杪翻紅
顏辭上國白眼入中原慢世吾何敢風塵且避喧

其六

拂衣先達怪高枕故人疑世路衡門左軒車負郭遲小
年誇解事薄俗諱言詩何處堪遙集悠悠未有期

其七

每逢河朔飲輒憶廣陵濤起色含佳句流光逼濁醪興
緣知己盡名豈罷官高髀肉看如此何論長二毛

其八

空林風雨過瀟灑一樽開看竹俄蠲疾漂蓬敢負才杜

門辭問字落日罷登臺不是憐嵇阮誰堪把臂來

其九

夜半忽風雨層樓四望孤雷盤華不注電劃大明湖雲
霧連屏疊蛟龍抱劍呼飛揚天地意垂老見吾徒

其十

何物子虛賦深承漢主知一逢楊得意千載遂同時諫
獵功名薄為郎日月私閒居堪避事稱病足逶迤

其十一

更聞人間語誰堪出處同江湖星自客詞賦日猶工物
色餘爭席生涯見轉蓬延陵皮相士竟失被裘翁

其十二

白頭明日事君不見交情千載論知己中原命友生青
雲高病色滄海傍詩名一為彈冠誤徒令國士輕

秋日村居

八首

隱几憐清曉開軒命濁醪西風行薜荔白露綴蒲桃氣
逼蟬聲苦天含鴈影高壯心堪自見秋色正滔滔

其二

病色還相假秋光溘自開清羸堪傍竹潦倒重銜杯返
照湖邊盡浮雲海上來即今知九辯無處不悲哉

其三

秋意長西北苔蘚望裏分青舍仙署雨白動帝鄉雲屈
宋終難達巢由故不群江湖三十載搖落好誰聞

其四

南山伏枕前北渚濯纓邊林薄秋逾厲雲霞曉自鮮談

詩成白首把酒望青天萬里中原色蕭條此地偏

其五

不必知名姓中原一病夫柴荆存古色藥餌泥窮途落
日懸魚笱西風纏輶轡生涯君自見百畝白雲湖

其六

高齋清自掩遙夕病相看片月花間淨明河樹杪流
螢含火著宿鷺抱霜寒何限同袍意江湖坐渺漫

其七

白雲不搖落湖上長悠悠世事銜杯過人情把袂休秋
光棲自老日色澹相愁况復多風雨蕭條傍倚樓

其八

搖落唯高枕風塵且閉關醉來雙白眼病起一青山交
態元難作詩名已自閑有人湖海上無事馬蹄間

冬日村居

四首

高卧堪人事幽棲豈世情老松寒更拙片竹冷逾清擁
褐江湖色鳴琴雨雪聲嬾心常近傲不是學莊生

其二

百年長藥裹三徑且蓬蒿
華髮抽簪短青山伏枕高
漂零知濁酒雨雪見綈袍
似解冥鴻意翻然變羽毛

其三

寒邛不可望蕭瑟掩柴扉
宿霧含霜苦斜陽帶雪微
清齋宜病色生事合漁磯
欲奏滄浪曲江湖此調稀

其四

遙夜憐幽獨南山傍
戶庭泉流霜下白野色海邊青
風

亂將殘燒寒疎欲曉星偶因樵唱起延眺及林垌

寄華從龍比以魚橘見致

多少人間事誰能便作書罷官君更早謝客我何疎八
月來吳橘三江下楚魚因風裁數字一問子雲廬

月

不是山中月誰能坐鬱陶蟾孤憐凍影免老愛霜毫暈
疊金波動寒侵玉樹高為題團扇句千里寄同袍

和殿卿神通寺見貽之作

花宮留妙唱綵筆遍高僧說法從初起談詩出上乘五
言爭刻燭一字了傳燈玄度前身是風流益可憑

同許右史遊南山寺宿天井寺

古寺馬蹄前荒山斷復連階危孤石倒崖響亂泉懸喬
木堪知午迴峰半隱天不因許玄度誰此得攀緣

龍集寺

千林窺壑險一徑入雲愁峰落青蓮色燈懸白日幽香
臺高枕出澗水閉門流聞道群龍集明珠自可求

錦陽川九塔寺觀許右史碑

名山諧夙好况復近吾廬嵐影浮斜照茲川錦不如空
林雙樹老寒塔九華疎一片頭陀石新文六代餘

元日

五十江湖客風塵一事違漁樵供藥餌雨雪偃荆扉白
髮詩篇苦清齋病色微平生拚縱酒今日不知非

立春前夜齋居殿卿攜具見枉

茅齋殘雪在新月况當門春動西園蓋寒空北海樽詩

篇閑自遣交態老難論似覺行厨色能清病客魂

立春日齋居對雪憶元美

齋居何所作春雪是佳期淨入年華淺光含暝色遲鳴絃流豔曲拂簡映新詩此夕山陰客扁舟興可知

襲生初度與郭子坤集開元寺餞許右史

論交三十載此地重尋盟夏臘高初度人天戀遠行青蓮澄筆彩白馬識經聲曾是春山夜談禪對友生

逃暑

無處堪逃暑高樓坐夜分
河流纏宿霧電影迸重雲
紈扇含冰彩珠簾網露文
漢宮多貴幸何以荅南熏

暴雨

西來氛甚惡夏至此何祥
雨伏千厓怒風迴萬壑長
雷聲盤暗牖電影纏空梁
少選虹霓出園林媚夕陽

寄子與使君

二首

一郡看如此扁舟意若何
白雲天目遍春水太湖多
怪事寧詞賦幽人自薜蘿
平生無俗客三徑許誰過

其二

我輩還堪見人間已厭聞大都常謝客不次各離群
病酒仍耽句青山自白雲春來論數子飄泊有如君

襲克懋託疾不肯入試賦贈

似得冥鴻意兼深抱壁情一鳴堪自失三獻轉相經
白雪看前輩青雲讓後生已須橫四海且復愛連城

寄懷余德甫

二首

豈亦逢秋色登臨若遠行江通灌嬰井山到越王城何

見非交態難言一宦情大東千里月石鏡好同明

其二

即聞彭蠡鴈應上武陽臺華髮文章到青山放逐回時
名堪下榻秋興足銜杯不是求羊輩蓬蒿斷往來

二月十五日誕子

三十盧家妾明珠報使君國香元有種天馬自超群月
應懸弧滿春迎翦紵分負薪還爾事豈敢望青雲

席上別王吳徐宗四子

仙吏滿蓬萊
離筵氣色開
檐帷寒食過
風雨太行來
一失中原遇
難論我輩才
華陽猶駿馬
涓者載金迴

答元美喜于鱗被召見寄

二首

十年君所見
已分老蓬蒿
安得浮名在
將無執事勞
海鷗群自下
天馬步元高
五柳還須種
徵君不姓陶

其二

那堪成僻性
非不愛明時
白髮終憐我
青山好屬誰
連城高一抱
流水妙相知
君自塙東客
行藏豈更疑

過呂梁

十年稱病客繫楫在樓船
漸下波方溜風鳴水正懸
青山高卧裏白髮壯遊前
起色聊相假終慙傲吏賢

宦情

二首

初服終能事徐生已自違
浮雲知失計漚鳥見忘機
越酒經春老江魚入夏肥
他鄉如不病一任宦情微

其二

我輩誠何意于今自解難
纍寧知衆嫠儂已罷新歡
白

雪狂歌盡青雲病疏看江湖終日在一任宦情閑

劉太保文安公輓章

十首

上公霑異典美謚表餘恩文並三光麗安同五嶽尊朝廷先達在社稷大名存廟議當時事稱天有世孫

右贈謚

遣奠煩容物臨軒憶典刑祠官開正寢法從輟明庭筵几知存問鍾彝藉寵靈老臣如就饗帷幄見談經

右諭祭

使從三省至地自九原開不作祁連象寧知漢代才佳
城跑躑躅法駕擁徘徊文劍今埋照于馬燭夜臺

右賜葬

國史從王事經筵飫帝慈龍章紆後寵魚水見前知雨
露含天藻山河勒制辭門生堪視草猶作起家疑

右頒誥

峴首羊公石千秋淚不禁孤墳寒自出華表鬱相臨陰
雨龍文動風霜鳥跡深更聞辭妙絕一字可生金

右立碑

自復遺書出相傳片字工史才依晉乘詩調託唐風草
疏回天力談經發聖聰少年耽作賦頗欲擬河東

右遺文

祠堂何所有遺像鹿臺山為是懸車處常聞曳履還諸
生從上黨三老自壺關伏臘蘋繁外談經俎豆間

右特祠

諸劉稱令族群從復清操家自駒千里人皆鳳一毛文

章爭左袒禮樂盛東曹五世傳經術推公甲第高

右世科

一時求舊德千載憶皇都北斗高元氣南山永帝圖青
雲餘几杖白首自江湖此日乘驄客問門意不孤

右達尊坊

小子元吾黨前賢亦故鄉春秋存俎豆日月望宮牆血
食堪千載精靈自一堂唯應楊伯起秦晉鬱相望

右從祀鄉賢

再過子與

浮名難自託佳會豈相圖
日月高詩社河山壯酒壚
歲星時一出白雪調元孤
繾綣非為佞風流不可無

七言律詩

送趙戶部出守淮陽

仙郎起草漢明光
幾載軍儲事朔方
五馬新為淮海郡
三臺舊署度支章
行車麥秀隨春雨
卧閣花深對夕陽
時憶上林詞賦客
鴻書遙下楚雲長

崔駙馬山池燕集得無字

主家池館帝城隅上客相如漢大夫十里芙蓉迎劍舄
一樽風雨對江湖橋邊取石鯨飛動臺上吹簫鳳有無
向夕不堪車馬散朱門空鎖月明孤

送彰德陳使君迎侍浙中

帝里初分郡檄回便迎青鳥建章臺東方千騎風雲下
南國雙帆河嶽來公子西園池上讌使君秋憲府中才
鄴天露冕行春日更許何人托乘陪

送郭子坤下第還濟南

華省栖遲白髮新，因憐失意轉憐春。
樽前病起逢寒食，客裏花開別故人。
賦就自堪生顧眄，才高豈合老風塵。
燕臺郭隗君家事，不擬驂騑不致身。

送王郎守安慶

花滿胡姬春酒樓，使君五馬五驂騑。
明光起草推高第，三十專城領上游。
天柱西懸江漢影，海門東控帝王州。
到來紆畫思，同舍萬里風煙白鴈秋。

送豐城杜少府謫滇南

共惜投荒萬里天
當朝起草事空傳
主恩綠鬢神仙尉
客夢青雲侍從年
盤水秋帆開瘴癘
黔陽春樹隔風煙
孤臣自有豐城劍
遙夜思家向斗邊

酬谷明府見寄

清時詞客滿公車
獨向漂零嘆不如
老去已拚常縱酒
秋來何意為裁書
薄遊更自淹華省
多病惟堪返敝廬
共道子雲長筆札
知君近日五侯疎

秋前一日同元美茂秦吳峻伯徐汝思集城南

樓

萬里銀河接御溝，千門夜色映南樓。
城頭客醉燕山月，笛裏寒生薊北秋。
胡地帛書鴻鴈動，漢宮紈扇婕妤愁。
西風明日吹雙鬢，且逐飛蓬賦遠遊。

送孫郎中守承天

鬱蔥佳氣漢江邊，今上龍飛北極年。
過幸沛宮三日飲，裁留郢曲大風篇。
仙郎珂散蓬萊月，太守帷開橘袖天。

明到為存湯沐邑須知父老借才賢

劉員外家宸翰樓

君家司寇此樓居奕葉承恩片帖餘帝自經筵傳翰墨
人從冊府見圖書煙雲繞檻生春色牛斗開函散楚墟
弦誦只今諸弟滿韋賢相業好誰如

送劉員外使黔中

牂牁萬里越王臺北眺中原秋色來江嶂忽分三楚斷
海天不盡百蠻開白雲使者乘軺過金馬祠官擁節迴

為泛昆明誇上苑
令知漢主自雄才

送大司寇之金陵

聞道銅標護百蠻
當朝共擬伏波還
來持滇海中丞節
入領西曹法從班
曳履春雲高北斗
迴車秋色照鍾山
顧期門客江城滿
草奏時時達漢關

送皇甫別駕往開州

銜杯昨日夏雲過
愁向燕山送玉珂
吳下詩名諸弟少
天涯宦跡左遷多
人家夜雨黎陽樹
客渡秋風瓠子河

自有呂虔刀可贈開州別駕豈蹉跎

送瑞安劉明府

劉楨詞賦不群才百里新承漢寵迴吳地青山飛鳥下
大江秋雨掛帆來白雲堪贈神明宰海色遙臨睥睨開
到日自逢花滿縣更憐春樹接天台

送許元復還姑蘇

薊門鴻鴈滿高秋張翰思家罷遠遊入洛故人名下士
度江寒夢雨邊舟客來白髮誰相憶賦就黃花不可留

興發鱸魚堪自釣吳楓搖落未須愁

署中有憶江南梅花者因以為賦

欲問梅花上苑逌座中南客重相思開簾署有青山色
對酒人如白雪枝驛使書來春不見仙郎夢斷月應知
偏驚直北多烽火昨夜關山笛裏吹

與茂秦金山寺亭上望西湖

孤亭遙上翠微重檻外空林何處鐘秋到諸天開薜蘿
湖連雙闕散芙蓉雲光忽落鼉鼉窟雨色飛來鷺鷥峯

自信登臨能作賦肯令陶謝不相從

送汪伯陽出守慶陽

中原萬騎卻胡兵客領銅符塞上行大漠清秋迷隴樹
黃河落日見秦城邠人自美西羌俗漢守誰高北地名
郡吏可能無薦達還令介子乞長纓

送黃侍御按滇中

去矣乘風瘴癘開西南萬里壯遊哉登臺越舊山形合
攬轡昆明秋色來周禮職方天外盡漢臣封事日邊迴

征蠻幕府今凋落安得樓船下瀨才

送包大中長蘆知事

九河水流何濺濺君去春花車馬前
入幕官僚清宴久揮毫渤海白雲天
相將牛酒勞從事未少魚鹽給俸錢
此去陸沉無不可于今薊北靜烽烟

除夕

幾年仙省白雲間此夕歸心醉裏閒
九塞烽煙連北極千門雪色照西山
還知傲吏能違俗未擬浮名好駐顏

長孺淮陽今不薄春花或恐滯燕關

元日早朝

禁城春色引朝天接跡夔龍近法筵雲裏金莖通御氣
宮中玉樹隱祈年西山亭障遙臨薊朔漠旌旗滿護燕
聞道至尊歌白雪小臣還獻郢人篇

早春得汝思蜀中書

萬里誰傳錦字迴楚天搖落正堪哀揚舲巫峽江聲合
立馬岷峨雪色來西極使星遙入部中原人日好登臺

莫言羽獵誇胡後不數揚雄作賦才

送惲貞外按察郢中

醉擁驪駒不可留送君花發鳳凰樓青春開府西陵色
到日登臺北鴈愁寒雨遠分荆楚望白雲無盡漢江流
共知人世悲難合儻得隋珠莫暗投

初春元美席上贈茂秦得闕字

鳳城楊柳又堪攀謝朓西園未擬還客久高吟生白髮
春來歸夢滿青山明時抱病風塵下短褐論交天地間

聞道鹿門妻子在祇今詞賦且燕關

送大中丞王大赴山東

天下軍儲飛輓來中原胡虜戰爭回漢柱舊題驄馬使
名家接武佩刀才按章時拂風塵入憲府秋臨海岱開
主恩偏憶嚴城日什二東秦保障哉

答宗考功齋居見贈

金莖夜擢建章高漢主祈年祀事勞仙吏詩投青玉案
故人秋卧白雲曹此生湖海供多病何物風塵抵濁醪

中散近來疎嬾甚更無書札到山濤

呈大司寇何公

漢臣韋氏有玄成舊德中朝曳履聲督部曾持滄海節
總戎親破綠林兵重瞻執法臨天座自失流言荷帝情
千載雲蒸龍變日更期文劍署高名

再呈何公

幾年開府漢中丞去後功名何武稱荆楚軍儲遮海過
潢池兵氣向秋澄尚書北斗天喉古司寇西曹帝股肱

耆舊即今推濟美清朝劍履坐相仍

春夜同元美子與子相過公實

西山落日照金莖北闕春陰覆禁城湖海百年今夜酒
風塵五子異時情和來白雪俱高唱自附青雲起大名
不獨諸郎關象緯真人應更為東行

送萬言卿明府之長興

逐虜將軍度漠回黃金猶自滿燕臺請纓慙我為齊客
製錦多君更楚材城上春雲天日出簾前秋色太湖來

弦歌暇日能相憶
花裏新詩過鴈裁

送范敬甫之閩中

共看驄馬使君賢
開府東南日月偏
海嶠秋陰分越樹
人家雨色散閩天
朝廷記憶江城久
詞賦知名水部前
還擬主恩頭白裏
時危相贈祖生鞭

五日同子與子相過公實時公實在告

空堂隱映石榴殷
花裏幽期白晝間
染翰風雲隨上客
開樽雷雨過西山
賦成敢避能驚座
酒罷何妨善閉關

況值懷沙千古怨那堪騎馬獨醒還

韋氏池亭同元美子與子相賦

四首

貫酒新豐解佩刀相逢意氣為君豪孤亭晝敞杉松色
亂石青含薜荔高自向風塵偏勝蹟豈令湖海傲吾曹
從他桂樹山中發招隱何勞更反騷

其二

華髮文章愧不工獨憐諸子調相同西京矯矯多奇氣
東海泱泱自大風三署仙郎攜酒後一時詞客此亭中

白雲寥廓迷幽薊
騶衍談天碣石宮

其三

幽亭斜日亂松聲
下有滄浪可濯纓
求友花間黃鳥出
垂天城上夏雲生
梁園作賦千年事
河朔銜杯萬古情
莫恨風流吾輩晚
鄒陽袁紹漢時名

其四

韋曲高臨漢苑開
城南連騎紫宸回
閉門流水花間過
倚檻青山席上來
客難似矜能避世
子虛誰見不憐才

若論承寵無先後安得吾曹共酒杯

送張元諭虞部謫常州別駕

賦就黃花別季鷹還從遣謫問飛騰
懸知漢柱名當藉況復虔刀事可憑
寒雨大江臨楚望千家秋色暗毘陵
闔閭城外逢搖落何限吳山客裏登

送吳人陸之箕

客有登臺賦遠遊薊門金盡坐高秋
總憐岐路無知己不向風塵為白頭
木落毘陵看過鴈月明張翰倚扁舟

未將簪紱論多病
草色姑蘇到自愁

送李司封謫廣陵

明光起草羨青春
服藥求仙笑此身
白首雲霄空薦士
黃金湖海未逢人
廣陵鴻鴈來秋色
寒雨江楓度逐臣
見說故園湘上水
嬾將詞賦弔靈均

滄溟集卷七

欽定四庫全書

滄溟集卷八

明 李攀龍 撰

七言律詩

送王侍御

看君繡斧秣陵迴，烏府遙應接鳳臺。
寒雨鍾山千水下，白雲秋色大江來。
時危攬轡中原出，日近封章北極開。
當道狐狸何足問，邊城今有郅都才。

同元美與子相公實分賦懷太山得鍾字東順

甫

域內名山有岱宗側身東望一相從
河流曉挂天門樹海色秋高日觀峰
金篋何人探漢策白雲千載護秦封
向來信宿藤蘿外杖底西風萬壑鐘

同子與登湖上臺

大漠蒼蒼鴻鴈迴中原極目思悠哉
白雲雙闕湖邊出落日西山樹杪來
詞客百年相對酒秋陰萬里共登臺
側身戎馬過逢地城柝朝聞角暮哀

十五夜子與明卿見過

日落青梧白露生
倦遊詞客鳳凰城
千門過鴈來秋色
萬里銜杯對月明
上苑寒高金狄掌
西山影靜羽林兵
解顏今夕無烽火
二妙何當罷請纓

同徐吳二子弘法寺臺眺望

搖落偏驚祇樹林
白雲鴻鴈亦蕭森
何知潘鬢淹郎署
但許燕山壯客心
欲雨諸陵來朔氣
西風千里動秋陰
悲哉聯壁登高賦
徙倚荒臺見古今

送大司寇應公歸台州

搖落黃金駿馬臺，都門供帳亦賢哉。
炎荒想見乘輅出，北斗旋聽曳履回。
秋色白雲生海嶠，主恩華髮卧天台。
西曹官屬銜知遇，東閣清時好再開。

送殷正甫

并引

正甫檢討有河洛之役，蓋濟南諸君子出餞焉，是行也，問誰治祖，則廷尉史張嵐氏問誰相禮，則大司農官屬洪遇伯時問誰贊事，則

許殷卿邦才將試於大宗伯至也正甫則稱
使臣哉齊魯於文學其天性即今日里黨可
謂多賢司馬長卿自漢庭遊梁鄒陽枚叔間
相得驩甚也乃比部李生以贈言

中州一望氣雄哉北極風塵使節開卜洛自存宗子計
遊梁更見長卿才春晴嵩少雲邊出雪盡黃河天上來
在昔孝王誇授簡何當置酒向平臺

徐子與席懷梁公實

共指金莖雪色間鳴珂當日滿朝班即看徐孺能懸榻
豈謂梁鴻更出關薄宦天涯成白首故人江上買青山
嶺南梅樹今堪折贈我寧無驛使還

懷子相

薊門秋杪送仙槎此日開樽轉歲華卧病山中生桂樹
懷人江上落梅花春來鴻鴈書千里夜色樓臺雪萬家
南粵東吳還獨往應憐薄宦滯天涯

朝退同子與望西霽雪懷南海梁公實廣陵宗

子相

騎省秋來歎二毛
還將白雪向君操
千峰曙色開金掌
並馬寒光照錦袍
空翠欲浮仙闕動
晴雲猶傍帝城高
初疑大庾梅花發
忽憶揚州八月濤

歲晚贈子與

南國鴻書杳不聞
相看梅發尚離群
天涯薄宦堪知我
世上虛名好誤君
杪歲西山逢雨雪
懷人漢苑見春雲
往時載酒揚雄宅
諸子談經坐夜分

人日與伯承集子與宅得胡字

新知握手鳳城隅，莫嘆春來滯宦途。
萬里風煙人日過，十年江海客星孤。
漢宮戴勝傳王母，薊北登高愧大夫。
曾是舊游行樂處，解貂同醉酒家胡。

張駕部宅梅花

仙郎雪後建章迴，清夜西堂擁上才。
笛裏春愁燕塞滿，梁間月色漢宮來。
即看芳樹催顏鬢，莫厭寒花對酒杯。
共憶故人江北望，因君賦罷倚徘徊。

宣武門眺望

白雲千里接胡天，雙闕遙臨碣石懸。
漢苑春生多雨雪，薊門晴色滿寒烟。
五陵佳氣蓬萊外，大漠青山睥睨前。
夙昔黃金收駿馬，高臺空作有誰憐。

送范大澈

十載風塵道路難，天涯金盡俗相看。
自憐華髮馮唐老，誰問綈袍范叔寒。
病起清樽開雨雪，歸來春草徧長安。
故人海上悲搖落，擬共秋濤把釣竿。

葛丈山房

少宰山房北海隈千林窈窕白雲開倚窻河勢鉤盤出
拂檻秋陰碣石來魯國諸生紛受易漢庭多士滿題才
臨流重憶乘槎客濯足還登萬里臺

寄子與

薊門春散紫宸班千里檐帷動客顏秋到白雲生漢署
雨來寒色滿燕山仙郎書札遙相憶傲吏風塵且未還
天上即今看舊好誰憐曼倩謫人間

寄吳舍人兼呈徐子與

薊門春酒別同袍
念我風塵解佩刀
楚客久無鸚鵡賦
舍人殊有鳳凰毛
書來月色漳河滿
北望秋陰漢闕高
行矣舊遊還自愛
偉長今在白雲曹

寄正叔

十年裘馬向飄零
一郡風塵出漢庭
塞北嵐煙春浩浩
薊門山色樹冥冥
懷人西署秋雲白
對酒疎燈夜雨青
莫道揚雄長寂寞
桓譚已見太玄經

趙州贈許使君

山雨蕭蕭曙色過，異鄉攜手問蹉跎。
豈緣知己朝廷少，自是詞臣岳牧多。
宋子城高臨大陸，漢王臺迴出滹沱。
風塵行役君須見，能得花前不醉歌。

送譙比部還順慶

歸去嘉陵江上春，檐帷不復厭風塵。
巴山漸出雲連楚，劍閣迴看雪照秦。
歲晚江湖多病疏，時危裘馬倦游人。
明光起草君無薄，漢主恩深侍從臣。

送申職方還魏縣

山中春色懌漂零
澤畔行吟見獨醒
縱使馮唐淹省署
還如汲黯在朝廷
漳河雨雪檐帷黑
大漠風塵燧火青
憶爾時危曾抗疏
至今諸將說龍庭

同張滑縣登清風樓

層樓落日倚蹉跎
明府高軒載酒過
檻外秋陰開大陸
簾前樹色散漳河
關門紫氣臨燕滿
風雨青山入晉多
我醉欲裁王粲賦
故園戎馬近如何

郡閣懷王徐二比部

曉漏鳴珂謁建章春風載酒出長楊詞華並數西臺妙
握草同稱大國香玉樹月明堪自倚金莖秋色坐相望
故人為郡逢搖落日夕看雲憶帝鄉

郡齋與舍人賦

漢臣春散建章宮此地相逢歎轉蓬落日開樽漳水上
清秋擁節太行東微官愧我潘生拙作賦多君楚調工
朋好即今三署滿故人猶滯右扶風

送顧天臣還姑蘇

落魄看君旅食年，風塵裘馬竟誰憐。
歸吳擬著潛夫論，入洛還攜贈婦篇。
少室夏雲憑檻外，太湖秋色挂帆前。
故人為客遙相念，垂老浮名薊北天。

郡城樓送明卿

二首

西來山色滿城頭，東望漳河入檻流。
傲吏歲時頻卧閣，故人風雨一登樓。
亂離王粲逢多病，著作虞卿老自愁。
君到長安相問訊，誰憐五月有披裘。

其二

徙倚高樓問索居故人湖海意何如樽中十日平原酒
袖裏三年薊北書大麓夏雲當檻出石門寒雨過城踈
明朝遠道空相憶那得仍停使者車

於郡樓送茂秦之京

把酒高樓眺暮春孤城落照濁漳濱自憐白髮常為客
誰道青山不負人西署詩名千氣象中原宦跡任風塵
元龍未下當時傲湖海看君意轉親

登黃榆馬陵諸山是太行絕頂處

四首

太行山色倚巔巔絕頂清秋萬里看
地坼黃河趨碣石天迴紫塞抱長安
悲風大壑飛流折白日千厓落木寒
向夕振衣來朔雨關門蕭瑟罷憑欄

其二

西嶺秋高大陸前馬陵寒影踏遙天
群峰不斷浮雲色絕嶂長留落日懸
地險關門衝急峽山奇削壁挂飛泉
何人更遇青泥飯有客空歌白石篇

其三

西來山色照邢襄北走并州擁大荒
巨麓秋陰沙渺渺石門寒氣雨蒼蒼
天邊睥睨懸句注樹杪飛流挂濁漳
搖落故人堪極目朔風千里白雲翔

其四

千峰郡閣望嵯峨此日褰帷按塞過
落木悲風鴻鴈下白雲秋色太行多
山連大陸蟠三晉水劃中原散九河
回首薊門高殺氣羽林諸將在橫戈

答元美病中見寄并示吳舍人

短髮青春照濁醪，因君忽憶廣陵濤。
露華遙對金尊渴，秋色驚看玉樹高。
伏枕風塵雙白眼，緘書湖海一綈袍。
何人更為憐同病，楚客參差長鳳毛。

早春寄元美

薊門霜雪意何如，回首風塵見索居。
病後五陵春草色，愁中三輔使君書。
時名轉憶潘生拙，世事能令阮藉疎。
最好拂衣江海上，故園戎馬重躊躇。

登邢臺

郡齋西北有邢臺落日登臨醉眼開
春樹萬家漳水上白雲千載太行來
孤城自老風塵色傲吏終慚岳牧才
便覺舊遊非浪迹至今鴻鴈薊門回

趙州道中憶殿卿

憶爾襜帷出牧年風塵誰識使君賢
政成神雀猶堪下興盡冥鴻遂杳然
樹色遠浮疎雨外人家忽斷夕陽前
重來此地逢寒食何處看春不可憐

真定邸中重憶殿卿

客舍題詩日已曛當時此地重離群
青樽夜倒潯沱月紫馬秋嘶大陸雲
春色那堪愁裡望緘書何意病中聞
依然趨府諸年少不見風流許使君

郡城西樓

使君杯酒郡城樓倚檻高臨落日愁
河朔浮雲連巨麓太行春雪照邢州
自憐叔夜常多傲無那相如故倦遊
畫省少年人所羨風塵豈亦念淹留

卷八
郡齋

金虎署中誰大名我今出守邢州城折腰差自強人意
白眼那堪無宦情世路悠悠幾知己風塵落落一狂生
春來病起少吏事擬草玄經還未成

春興

東南殺氣日相纏重憶先朝海晏年使者自歸沈璧馬
將軍誰起護樓船旌旗愁動昆明色大鉞高懸薊北天
坐使越裳來白雉更追敵騎過燕然

寄劉子成

書札清秋問解攜
郡齋吟眺楚雲低
大夫持憲臨諸粵
使者徵兵出五溪
白日自流荒徼外
青山不盡夜郎西
于今萬里看銅柱
何意中原厭鼓鼙

懷元美

白雲何處一開尊
山色看君滿薊門
落日蕭條迴朔氣
清秋偃蹇向中原
舊知太守齊狂士
不佞扶風漢大藩
病渴自銜金掌露
將因著賦乞文園

懷明卿

清秋羽檄薊門城
楚客登臨短髮生
已厭風塵多病色
何妨侍從有詩名
憐才欲薦雲中守
抗疏先論海上兵
此日主恩深顧問
還如方朔在西京

懷子相

薊門秋氣動鳴珂
蕭瑟東南海賊過
亂後人才掄欲盡
留中啟事草如何
裁詩漢署青天色
伏枕燕山落日多
豈亦念余經術淺
明年投劾罷京河

懷子與

登高作賦大夫哉搖落江南重可哀
染翰白雲天日出振衣秋色太湖來
吳中父老紛相難海上樓船戰不回
再入承明君莫厭薊門猶有故人杯

懷順甫

西曹群少舊相求載酒燕山幾壯遊
綵筆憑陵迴落日白雲蕭瑟坐高秋
風塵混合中原色江漢長懸萬里流
自是歲星人不識于今蹭蹬守邢州

懷公實

明光起草自高名復羨梁鴻出漢京
白日顧瞻雙鳳闕青春卧病五羊城
人間已見新詩滿海上還聞大藥成
應笑舊時同舍客風塵請郡愧平生

送張肖甫出計閩廣

二首

聞道天書出漢宮君才博望遠相同
少年章奏郎官裏大海樓船使者中
度嶺春陰生白瘴及閩秋色暗青楓
懸知諸將平胡日聖主先論轉餉功

其二

司農飛輓七閩開芻粟如山百粵來落日中原看倚劍
清秋大海傍登臺三城羽檄單于過十道軍儲使者迴
郎署即今多顧問誰憐魏尚有邊才

真定道中遇伯承戶曹

渾沱冰合大風鳴馬上寒雲護北征我自朝天稱四嶽
君還謁帝入承明黃金結客樽前盡白髮先春雪裏生
握手不須悲物役梅花搖落故園情

真定大悲閣

高閣峻嶒倚素秋
西山寒影掛城頭
坐來大陸當窻盡
不斷滹沱入檻流
下界蒼茫元氣合
諸天縹緲白雲愁
使君趨省無多暇
暫爾登臨作壯遊

初至京與元美明卿子與分韻

二首

邢州計吏入長安
春色西山雪裡看
天地容吾常落魄
風塵對爾一加餐
重來省署青雲隔
不散關門紫氣寒
握手依然無長客
可知千載和歌難

其二

北風吹折九河冰五馬如龍度李膺把袂中原來氣色
開樽碣石倚憑陵明堂大集周方岳列郡深慙漢股肱
詞賦祇今吾黨在將因顧眄一先登

除夕元美宅

蓬萊佳氣舊霏微把酒千門朔雪飛繾綣綈袍回夜色
縱橫綵筆動春暉何來天地愁相向自信風塵意不違
漢主明朝還受計君看五馬賜金歸

送陳比部使閩中

西曹詞賦有陳琳
南去其如草檄心
百粵大雲搖海色
九峰寒雨壯秋陰
將軍盪寇功名薄
使者銜恩日月深
華髮總淹三輔吏
風塵何處不蕭森

留別元美輩四子

華髮西來謁帝遊
風塵莫問使人愁
但看詞賦青雲色
不盡江河白日流
杯酒千山迴大漠
春花五馬入邢州
黃金愧我無經術
歸去冥鴻未可求

送明卿謫江西

海上風塵未罷兵如何嚴助厭承明故人慘淡浮雲色
逐客蕭條白雪晴落日挂帆彭蠡澤清秋伏枕豫章城
詩篇已側當時目不必兼傳抗疏名

將歸郡屬元美出使畿內作此為別

西方千騎至朝宗使者銜恩下九重握手白雲生鉅鹿
離心落日滿盧龍青春上苑還堪醉我輩中原未可逢
雄劍有神君自愛莫令風雨暗芙蓉

郡齋同元美賦得河字

孤城高枕日蹉跎使者乘槎自九河
亂後故人京洛少秋來山色郡齋多
詩名更向風塵起傲吏還能意氣過
我亦平生難盡醉開樽無奈子猷何

與元美登郡樓二首其一得秋字

開軒萬里坐高秋把酒漳河正北流
自愛青山供使者誰堪華髮滯邢州
浮雲不盡蕭條色落日遙臨睥睨愁
上國風塵還倚劍中原我輩更登樓

其二得雲字

搖落高樓此對君
天涯不復有離群
銜杯大麓來秋色
倚檻邢臺過白雲
樹杪人家漳水出
城頭風雨太行分
極知今日同王粲
賦就還應鄴下聞

與盧次楨登大伾山

河朔風塵萬里看
空亭天外一憑欄
夕陽忽送孤城色
高雪遙臨白馬寒
何處浮雲吞大澤
于時紫氣滿長安
我來欲著浮邱賦
此地因君老鵷冠

於黎陽送次梗之金陵謁故陸令

蕭條杯酒對銷魂
河朔諸生爾獨存
書上梁王還寢獄
賦成揚子不過門
大江雨雪千帆出
建業風流六代論
雄劍自憐為客意
左驂寧負主人恩

懷慶道中雪

飛雪長驅使者車
太行愁色滿天涯
虛傳梁苑平臺賦
真作河陽一縣花
流影風前迎劍氣
寒光樹杪澹人家
問津明日知何處
千里西來有漢槎

崆峒

二首

風塵問道欲如何二月崆峒覽勝過
返照自懸疏隴樹浮雲忽斷出湮河
長城雪色當峰盡大漠春陰入塞多
已負清尊尋窈窕還將孤劍倚嵯峨

其二

誰道崆峒不壯遊香鑪春雪照涼州
浮雲半插孤峰色落日長窺大壑愁
萬乘東還靈氣歇諸天西盡濁湮流
蕭關祇在滕羅外客子風塵自白頭

平涼

春色蕭條白日斜
平涼西北見天涯
唯餘青草王孫路
不屬朱門帝子家
宛馬如雲開漢苑
秦兵二月走胡沙
欲投萬里封侯筆
愧我談經鬢有華

寄元美

四首

風塵萬里一蕭然
病起相思到各天
忽見南山青草色
還成北海白雲篇
登樓何處逢多暇
開府于今實少年
不是漢庭容汲黯
如君意氣好誰憐

其二

聞君雨雪到青州春盡鴻書未可求
莫問彈冠千載事徒令把袂故人愁
浮雲萬里中原色落日孤城大海流
自昔風塵驅傲吏還能伏枕向清秋

其三

紫塞春風散羽書使君高枕見離居
人間不識胡名馬門下猶傳海大魚
開府少陽還氣色登臺東嶽復何如
遙知醉後吳歌發落日蕭條薄望諸

其四

不盡青山帶落暉
美人何處送將歸
城邊澠水寒如酒
馬首浮雲曳作衣
春到他鄉還健食
時危薄宦豈雄飛
自從二子中原別
回首風塵萬事違

上郡
首二

高城窈窕四山開
西北浮雲睥睨迴
鼓角疑從天外落
輶車真自日邊來
防胡尚借秦人策
射石猶傳漢吏才
聞道朝廷思猛士
羽書飛過赫連臺

其二

叱馭何來絕塞遊
獨看山色向新秋
人家漸出層崖樹
客路高盤斷壑流
朔氣忽隨風雨至
孤城長傍夕陽愁
五原子弟輕烽火
馬上談經半白頭

元美望海見寄

白雲東望十洲開
苦憶玄虛作賦才
大壑秋陰生蜃氣
扶桑日色照樓臺
波濤漢使乘槎過
風雨秦王策石來
縱有三山何可到
不如相見且銜杯

酬順甫見寄

仙郎春思滿漳河天上雙魚寄楚歌
自隔青雲知己盡誰言白雪和人多
山城薄曙輶車發幕府先秋羽檄過
磬折路傍君不見漆園為吏傲如何

人日答汝思

濁酒初開栢葉新醉來高枕任風塵
十年關塞愁中客此日江湖病裡人
青鏡欲催潘鬢改綠花空翦漢宮春
即今萬事抽簪外唯有浮雲傍角巾

再寄元美

二首

黃金臺館鬱蒼蒼
遊子高秋總斷腸
萬里浮雲生渤海
千山朔氣壓漁陽
風塵不老江湖色
宮闕新懸日月光
安得與君燕市裡
和歌長在酒人傍

其二

中丞遼海罷登壇
公子紅顏復挂冠
自有綈袍憐范叔
誰從長鋏見馮驩
上書北闕風雲壯
灑淚西山雨雪寒
憔悴儘堪知國士
相逢應作少年看

寄汝思

高秋諸將欲橫行
薊北先開細柳營
萬里旌旗連殺氣
千山鼓角動邊聲
指揮士馬中原合
談笑風塵瀚海清
此日漢軍俱望幸
滿朝應重亞夫名

送歷城李明府入計

春生仙令鸛鵲袍
風雪褰帷擁佩刀
忽憶鳴珂雙闕迴
翻然飛鳥五雲高
朝堂不改燕山色
計吏寧分漢主勞
為政只今多異蹟
須知帝力到秋毫

題少方伯徐公明月軒

三首

傲吏高齋海岱開，長留明月照池臺。
白雲湖上秋何處，鴻鴈樽前客自來。
寒色玉壺堪徙倚，流光華髮與徘徊。
西園諸子俱能賦，獨讓應徐鄴下才。

其二

應憐明月滿長安，永夜憑軒萬里看。
秋水乍疑湖外合，白雲猶似署中寒。
繞枝烏鵲星霜色，一曲關山道路難。
此興庾公曾不淺，南樓參佐幾人歡。

其三

湖上風流畫省新
堪多明月少紅塵
長懸素魄銜金鏡
不減清光抱玉人
當戶雲生屏自倚
拂牀星動劍相親
看君如在揚雄宅
擲管玄經合有神

送俞按察之湖廣

二首

檐帷十載使君東
開府還當楚地雄
江漢日高天子氣
樓臺秋敞大王風
重瞻執法臨台象
自許論文見國工
有客儻能鸚鵡賦
莫令才子嘆漂蓬

其二

攬轡江湖萬里清使君三楚舊知名陽春不是尋常調
明月堪償十五城行省重臣推掌憲中原多事盛談兵
遙憐佐吏耽秋色不羨南樓庾亮情

送張直卿再遷三楚參政

誰言才子竟漂零十載功名滿漢庭前後兩曹推起草
風流百粵讓談經重來方岳分荆楚此去江湖識歲星
明主賜環今日事武昌楊柳幾回青

元美以吳紗見惠作此謝之

西施浣紗江水中下機便入吳王宮憶昔紅顏銷白雪
淒然素手弄秋風新裁辟荔忽無色更集芙蓉應未工
知君贈我視縞帶願言不忘披裘翁

答寄華從龍戶曹

起草當年漢署才毘陵尺素為誰來山中鴻鴈三秋色
江上浮雲萬里臺總是風塵淹伏枕空將日月老銜杯
清時仲蔚非無意謝客蓬蒿更不開

贈符臺卿李伯承出使東藩

二首

漢宮春色照蘭臺
符節分曹右掖開
司馬長卿詞客幸
東方曼倩侍臣才
海濱城闕浮槎下
天上風雲擁傳來
無那故人常伏枕
論詩還為一銜杯

其二

春風紫禁日朝天
帝寵東藩奉使年
直省月臨三殿出
軺車星度九河懸
綈袍忽動青雲色
華髮逾驚白雪篇
莫道古人霄漢少
如君侍從總堪憐

除夕

夜色蕭條雪滿庭，唯應濁酒見漂零。
關門忽散真人氣，滄海還高處士星。
一自倦游拚謝客，遂因移疾罷傳經。
春風明日長安道，依舊王孫草又青。

杪秋登太華山絕頂

四首

華頂蒼蒼四望開，正逢蕭瑟氣悲哉。
黃河忽墮三峰下，秋色遙從萬里來。
北極風塵還郡國，中原日月自樓臺。
君王儻問仙人掌，願上芙蓉露一杯。

其二


縹緲真探白帝宮
三峰此日為誰雄
蒼龍半挂秦川雨
石馬長嘶漢苑風
地敞中原秋色盡
天開萬里夕陽空
平生突兀看人意
容爾深知造化功

其三

太華高臨萬里看
中原秋色更漫漫
振衣瀑布青雲濕
倚劍明星白日寒
東走峰陰搖砥柱
西來紫氣屬長安
自憐綵筆驚人在
只尺天開謁帝難

其四

徙倚三峰峰上頭
蕭條萬里見高秋
蓮花直撲青天色
玉女常含白雪愁
樹杪雲靈沙漠氣
岩前日暈漢江流
停杯一嘯十年事
不擬人間說壯遊



滄溟集卷八